

Ngā hua mō ngā tamariki me ngā rangatahi Māori me ō rātou whānau


i roto i te pūnaha oranga tamariki 2023/24

HE WHAKARĀPOPOTOTANGA WHAI WHAKAATURANGA

Ko te pūnaha oranga tamariki te ingoa mō ngā mahi a Oranga Tamariki me ētahi atu tari kia noho haumarū, kia ora ai ngā tamariki me ngā rangatahi. Kei roto hoki i tēnei ko ngā mahi a ngā pirihiimana ina takahia pea e ngā tamariki me ngā rangatahi te ture.

Ka uru ngā tamariki me ngā rangatahi ki te pūnaha oranga tamariki ina whakamōhiotia a Oranga Tamariki e te tangata ina māharahara ana ia mō tō rātou haumarū, oranga rānei, ina uru rānei ki te raruraru me ngā pirihiimana.

Ka titiro tēnei pūrongo he pēhea te pai o te whakatutuki a te pūnaha oranga tamariki i ngā hiahia o ngā tamariki me ngā rangatahi Māori me ō rātou whānau.



Kia mōhio ai he aha ngā āwhina whaitake mā ngā tamariki me ngā rangatahi me ngā mea koretake, tata ki te 130 ngā tamariki me ngā rangatahi Māori me ngā tāngata tata ki te 1,600 atu anō i tuku kōrero mai pērā i ngā whānau me ngā kaitiaki, ngā tauwhiro hapori, ngā kaiako, ngā pirihiimana, ngā rata, ngā nēhi me ngā kaimahi taiohi. Hei āwhina i a mātou kia mārama ai e pēhea ana te haere a ngā mahi, i whakaemi mōhiohio anō mātou mō ngā pakeke Māori i uru ki te pūnaha oranga tamariki i tō rātou tamarikitanga – mō te manaaki me te whakamaru, te ture taiohi rānei. I whakaemihia katoahia e mātou ēnei mōhiohio katoa ka tuhia he pūrongo mā te Kāwanatanga. I whakairihia tēnei ki tā mātou paetukutuku kia pānuitia e ngā tāngata katoa.

Ā mātou kitenga:

Ko te nuinga o ngā tamariki me ngā rangatahi Māori kāore i roto i te pūnaha oranga tamariki.



- Ko ngā tamariki me ngā rangatahi Māori
- Ko ngā tamariki me ngā rangatahi Tauwiwi

Engari, he nui ake ngā tamariki me ngā rangatahi Māori kei roto i te pūnaha oranga tamariki tēnā i ngā tamariki me ngā rangatahi tauwiwi – nui atu ki tērā e pōhēhētia ana koe mai i te nui o te taupori o ngā tamariki me ngā rangatahi Māori. Kua roa e pēnei ana. Ina rite ana te tokomaha o ngā tamariki me ngā rangatahi Māori ki te nui o te taupori, i reira kua mōhio tātou kei te pai ake te pūnaha.

Ina uru atu ngā tamariki me ngā rangatahi Māori ki a Oranga Tamariki, ka nui ake te tūponotanga ka uru ki te maru karauna, te mauhere rānei. Ka nui ake hoki te tūponotanga ka hāmenetia e ngā pirihiimana mēnā ka takahia e rātou te ture.



He rite tonu ngā tūmanako me ngā moemoeā a tamariki me ngā rangatahi Māori ka uru ki te pūnaha oranga tamariki mō tō rātou anamata ki te hunga kīhai i uru atu. Engari, kāore i te eke panuku tō rātou ao pera i ngā tamariki me ngā rangatahi Māori kāore i te uru atu. Kāore i te pērā te pai o ō rātou hauora me te mātauranga, ka mutu kāore i te ōrite te tūponotanga ka pai ō rātou ao.



Ko tētahi take mō tēnei kāore e whiwhi ngā tamariki me ngā rangatahi Māori i ngā āwhina i te tīmatanga i ngā wā katoa. I rongo mātou kāore e taea e Oranga Tamariki te urupare i ngā wā katoa ina rongo tuatahi rātou mō ngā māharahara. Ko te nuinga o ngā rangatahi ka uru ki te raruraru me ngā pirihiimana i kōrerohia kētia atu e te tangata ki a Oranga Tamariki i te māharahara mō rātou, engari kāore i whiwhi tautoko i te nuinga o te wā. I ētahi wā kāore tonu i whiwhi paku āwhina.



Ko te tikanga me āwhina ngā family group conferences (ngā FGC). I ngā FGC ka hui a Oranga Tamariki, ngā pirihiimana me ētahi atu tari me te whānau ki te whakarite mahere me te toro tautoko mā ngā tamariki me ngā rangatahi. I rongo mātou kāore e tutuki ngā FGC i ngā wā katoa. Ko te take kāore ngā kaimahi i te whai wā, pūtea rānei hei whakahaere tika i ngā FGC, kāore rānei e whakaae tahi a Oranga Tamariki, ngā pirihiimana, ngā tari kāwanatanga rānei mō ngā mahere whānau. I rongo anō mātou, ko te whakaaro o ngā tamariki me ngā rangatahi kāore ō rātou reo i ngā FGC – arā, kāore te mahere i te whai i ngā mea e hiahiatia ana.



I rongo mātou mō te whiwhi a ētahi o ngā tamariki me ngā rangatahi Māori i ngā āwhina whaikiko mā rātou. Ko ēnei āwhina ka ahu mai i ngā iwi me ngā whakahaere Māori e mahi ana i roto i te hapori. He hoa rautaki o Oranga Tamariki e taea ai ēnei. I rongo mātou i nā tata nei i poroa ētahi o ngā pūtea mō ngā ratonga e tuku ana i ēnei āwhina. Ko te tikanga o tēnei kāore i te tino nui ngā āwhina mā ngā tamariki me ngā rangatahi pērā i mua.



Kua mau ngā reanga o ētahi whānau ki te pūnaha oranga tamariki. Arā ko tōna tikanga ko ngā tamariki me ngā rangatahi kei roto i te pūnaha ināianei, i uru anō pea ō rātou mātua i tō rātou nā tamarikitanga. Ka whiwhi ēnei tamariki i ā rātou ake tamariki, ka nui ake te tūponotanga ka uru hoki ēnei tamariki ki te pūnaha oranga tamariki. Ko te tikanga o tērā kāore he take o te take o te pūnaha ki te tautoko i ngā tamariki me ngā rangatahi Māori. Mā te aukati i tēnei āhuetanga tuku iho e mōhio ai tātou kei te pai haere ake te pūnaha.



Ina uru ngā tamariki me ngā rangatahi Māori ki te pūnaha oranga tamariki, me whiwhi rātou i ngā tautoko tika i te wā tika kia kore ai noho roa ki roto.



“

*Ko tōku hiahia kia tika
te pakeke mai, ā, mēnā
ka kitea e au he hoa
tōtika, kia whiwhi ai
aku tamariki i ngā mea
kāore au i whiwhi.”*

RANGATAHI

